

四庫全書

經部

欽定四庫全書

六家詩名物疏卷四十九 明 馮復京 撰

大雅生民之什二

鳧鷖篇

鷖

倉頡解詁曰鷖鷖也一名水鴉○禽經云鷖信鳥也信不知用注云鷖如倉庚而小隨潮而翔迎浪蔽日食小魚潮至則翔水嚮以為信反為鷖鳥所擊是知信而不

知所以自害也○晉中興說云鷗湖澤鳥○南越志云鷗在漲海中隨潮上下常以三月風至乃還洲嶼生卵似鷄卵色青頗知風雨若羣飛至岸必風○風土記云鷗以名自呼大如雞生卵于荷葉之上○埤雅云鷗鳧屬鳧好沒鷗好浮○雅翼云鷗色青黑亦有白者

公尸

箋云首章尸在宗廟次章祭四方百物之尸

蜡祭事見甫田篇農

夫三章祭天地之尸四章祭社稷山川之尸

社稷見甫田篇社山

川見簡  
兮篇方

五章七祀之尸疏云宗廟祭後燕尸大夫謂之  
賓尸即用祭日天子諸侯謂之繹以祭之明日燕祭天  
地之尸即以祭日其餘諸神亦以其日也○首章箋云  
祭祀既畢明日又設禮而與尸燕○爾雅云繹又祭  
也周曰繹商曰彤夏曰復昨○公羊傳云繹者何祭  
之明日也○穀梁云繹者祭之旦日之享賓也○禮  
器云設祭于堂為祊乎外故曰於彼乎於此乎郊特  
牲孔子曰繹之於庫門內祊之於東方失之矣注云祊

之禮宜於廟門外之西室繹又於其堂神位於西也祭  
義曰君牽牲夫人奠盥君獻尸夫人薦豆注謂繹日也  
又曰祭之日明發不寐饗而致之又從而思之祭統曰  
詔祝于室而出於祊此交神明之道也○禮書曰繹于  
明日則異牲詩曰自羊徂牛是也賓尸于祭日則用正  
祭之牲而已有司徹燂尸俎是也蓋正祭重而主於禮  
神繹輕而主於禮尸重故省牲視具在宗伯輕故使士  
而爵弁絲衣者也主於禮神故在室主於禮尸故在堂

則自堂徂基掃堂設筵者皆堂上之事○三章箋云渚猶平地之有丘喻祭天地之尸疏云此惟喻二至之祭其文不及郊○周禮大宰祀大神示掌百官之誓戒與其具修掌次王旅上帝則張氈案設皇邸司裘掌為大裘以共王祀天之服大宗伯以禋祀祀昊天上帝以蒼璧禮天以黃琮禮地牲幣各放其器之色注云此禮天以冬至謂天皇帝在北極者也禮地以夏至謂神在崑崙者也又云凡祀大神祭大示帥執事

而卜日宿眡滌濯省牲鑊奉玉齎詔大號司服王祀昊天上帝則服大裘而冕大司樂凡樂圜鍾為宮黃鍾為角大簇為徵姑洗為羽雷鼓雷鼗孤竹之管雲和之琴瑟雲門之舞冬日至於地上之圜丘奏之若樂六變則天神皆降可得而禮矣函鍾為宮大簇為角姑洗為徵南呂為羽靈鼓靈鼗孫竹之管空桑之琴瑟咸池之舞夏至於澤中之方丘奏之若樂八變則地示皆出可得而禮矣凡以神仕者以冬至致天神人鬼以夏日

至致地示物鬼○曲禮曰天子祭天地歲徧禮器云祭  
天特牲又云為高必因丘陵為下必因川澤是故因天  
事天因地事地

按二丘二郊鄭氏分而為四冬至圜丘所祭之天  
謂之昊天上帝即北辰耀魄寶也又謂之天皇大帝  
又謂之太一帝君夏日至方丘所祭之地謂崑崙地  
祇也王者各稟五帝之精氣而王天下於夏正建寅  
之月祭于南郊謂之感生帝月令云孟春元日祈穀



于上帝即此祭也北郊所祭乃神州地祇或曰合祀于夏正之月或云建申之月祭之冬至祭昊天周人配以鬯南郊祭感帝周人配以稷祭法所謂禘鬯而郊稷也王肅之徒則以郊丘為一按記云周之始郊日以至則郊以冬至有合王說爾雅云祭天曰燔柴祭地曰瘞瘞與泰壇泰折之禮同若祭以掃地薦以血牲以犢車以大路樽以犧鬯以疏布杓以禪器以陶匏藉以蒲越藁秸措大圭執鎮圭及卜郊聽報尚

書稱用牲于郊社皆詳于郊而畧于丘則郊丘為一  
王論確矣為鄭學者則云周禮祀昊天上帝大裘而  
冕郊特牲云郊祭之日戴冕璪十有二旒是服不同  
也周禮玉路以祀天郊特牲云乘素車是車不同也  
祭法云燔柴於泰壇用騂犢周禮蒼璧禮天牲從玉  
色是牲不同也爾雅云非人為之丘泰壇泰折人力  
所為又與方圓之丘別故知郊丘有異按家語云臨  
燔柴脫袞冕著大裘象天則初服袞冕後著大裘知

所說服同矣素車殷禮也玉路周禮也乃二代車制有異非郊丘為二是車之不同不足論矣郊特牲云牲用騂牧人云陽祀用騂牲是也宗伯云皆有牲幣各放器之色則其說踳駁或記者因周尚赤牲用騂故絜云騂犢而二至之祭實用蒼黃之牲與其詳不可得而考要之以郊丘為一者其理為勝若爾雅丘字之訓又不足辨釋丘云絕高為之京非人為之丘毛傳云京高丘也則散文亦通矣詩禮有郊稷之文

不聞有圓丘配嚳之說禘蓋宗廟五年之大祭祀其  
祖之所出而不以配天也此外有迎氣四郊及季夏  
祭黃帝含樞紐所謂祭五帝也又四月龍見而雩總  
祭五帝於南郊季秋又大饗五帝于明堂皆祭太微  
五精之帝也祭地自崑崙神州大雩而下至五土之  
示成羣之置社皆地示之屬矣

卒章箋曰燕七祀之尸○曲禮云天子諸侯大夫祭五  
祀歲徧月令春祀戶祭先脾夏祀竈祭先肺季夏祀中

雷祭先心秋祀門祭先肝冬祀行祭先腎孟冬臘先祖  
五祀禮器曰禮行五祀正法則也家主中雷國主社郊  
特牲云三獻文祭法云王為羣姓立七祀曰司命曰中  
雷曰國門曰國行曰泰厲曰戶曰竈王自為立七祀諸  
侯為國立五祀曰司命曰中雷曰國門曰國行曰公厲  
諸侯自為立五祀大夫立三祀曰族厲曰門曰行適士  
立二祀曰門曰行庶士庶人立一祀或立戶或立竈○  
白虎通云祭五祀天子諸侯以牛卿大夫以羊因四時

牲也一說戶以羊竈以雉中雷以豚門以犬井以豕或  
曰中雷用牛餘不得用○禮書云考之于禮五祀之牲  
牛牲凡祭五祀于廟有主有尸觀月令臘先祖五祀同  
時則五祀祭于廟可知也曾子問既殯祭五祀尸入三  
飯則五祀有尸可知也既殯而祭不醕不酢則凡祭五  
祀固有侑醕與酢矣老婦之祭先儒以為竈配則五祀  
固有配矣先儒又謂卿以上宗廟有主五祀亦有主矣  
大夫以下宗廟無主五祀亦如之然大夫之廟未嘗無

主五祀有主與否不可考也

按禮記月令及中雷禮呂覽皆曰冬祭行行在廟門外之西檀弓云毀宗躡行是也淮南子白虎通則云冬祀井其說以井者水之生藏在地中冬亦水王萬物伏藏故祀井于冬也二說不同恐當以禮記為正緣月令祭法竝有祭行之言及中雷禮所記祭行禮甚詳不應皆誤蔡邕亦以為冬祭行

沙

說文云沙水中散石也○易需卦九二需于沙注云沙接水者○釋水云渾沙出注云今河中呼水中沙堆為渾

脯

釋名云脯搏也乾燥相搏著也脩縮也乾燥而縮也○周禮膳夫凡王之稍事設薦脯醢膳人掌乾肉凡田獸之脯腊臠脾之事凡祭祀共豆脯薦脯臠脾凡腊物賓客喪紀共其脯腊注云薄析曰脯捶之而施薑桂曰臠



脩腊小物全乾○曲禮云以脯脩置者左胸右末祭宗廟脯曰尹祭婦人之摯脯脩內則牛脩鹿脯田豕脯麋脯麇脯大夫燕食有膾無脯有脯無膾郊特牲云大饗尚脩而已矣少儀云其以束脩賜人若獻人則執脩以將命○禮書云膳夫凡王之稍食則脯醢冠禮醢則脯醢喪禮小斂特豚脯醢以脯醢之于魚腊俎為輕故也大饗尚脩脩以禮賓冠禮取脯以見母婚禮賓取脯授從者燕禮賓執脯賜鍾人又婚禮婦摯脩脯以見姑

學者束脩以見師以脯之于禮為重故也用之于前則冠禮始醺再醺之類是也羞之於後則籩人加籩之實栗脯是也脯體之直謂之脰士虞脯四脰鄉飲禮薦脯五脰是也脰亦謂之臠鄉射禮薦腊用籩五臠祭半臠臠長尺二寸是也

淥

說文云淥小水入大水也○箋云水外之高者也

鹽

傳云疊山絕水也○詩緝云疊謂山當水路令水勢斷絕也西漢地里志金城郡有浩疊縣注云浩水名也疊者水流峽山間兩岸深若門也

假樂篇

百辟

箋云畿內諸侯○王制云天子三公之田視公侯天子之卿視伯天子之大夫視子男天子之元士視附庸天子之縣內諸侯祿也外諸侯嗣也○周禮太宰以八則

治都鄙注云公卿大夫之采邑王子弟所食邑在畿內者載師云以家邑之田任稍地以小都之田任縣地以大都之田任畛地賈公彥云家邑大夫之采也小都六卿之采也大都三公之采也親王子母弟與公同處而百里次疏者與六卿同處而五十里次疏者與大夫同處二十五里○典命云王之三公八命其卿六命其大夫四命其出封加一等

按孟子云天子之卿受地視侯大夫受地視伯元士

受地視子男與王制所言不同鄭以王制為殷因夏禮然則王制是夏商之法孟子自說周制矣鄭氏謂周公制太平拓大九州之境故公封方五百里侯封方四百里伯封方三百里子封方二百里男封方百里而內諸侯采地最多者儉于百里何也以百里五十里二十五里為差與王制孟子俱不合鄭果何據乎孟子又以百里七十里五十里三等之封為周制若使周制果如大司徒所云孟子何以不聞乎且周

公雖致太平計其拓地豈能殊絕殷夏之世而封外  
諸侯之地遽加多若此外諸侯既加內諸侯又不應  
獨儉凡此皆周禮之可疑者也鄭氏注大司徒既以  
王制縣內之數為夏之采地周則未聞注小司徒又  
云采地百里之國凡四都五十里之國凡四縣二十  
五里凡四甸是前後自相戾也其注王制云畿內封  
國之數各有致仕者副之載師注又以宅田任近郊  
之地為致仕之家所受田其稍縣置三等不云有致

仕者之田在內蓋亦以為周變前代之法其詳不可得而攷矣王制孟子皆云有天子元士之地豈即載師所謂以士田任近郊者乎

公劉篇

積

箋云乃有積委○周禮大司徒大賓客令野修道委積小司徒小賓客令野修道委積遣人掌邦之委積以待施惠鄉里之委積以恤民之難阨門闕之委積以養老

孤郊里之委積以待賓客野鄙之委積以待羈旅縣都之委積以待凶荒凡賓客會同師役掌其道路之委積凡國野之道路室有委候館有積注云委積者廩人倉人計九穀之數足國用以其餘共之少曰委多曰積遂人凡賓客令野修道而委積遂師賓客庀其委積廩人以歲之上下數邦用凡邦有會同師役之事則治其糧與其食倉人凡國之大事共道路之委積掌訝賓客至戒官修委積



糧

說文云穀食也○周禮廩人凡會同師役之事治其糧

橐囊

傳云小曰橐大曰囊○孫奔亦兒編說文曰無底曰囊  
有底曰橐董氏曰無底曰橐有底曰囊唐韻云橐無底  
囊二說不同並存之○徐鍇曰無底曰橐今纏腰下者  
○詩緝云東方朔傳云奉一囊粟是糧米盛于囊也

臧詳見齊風斧

傳云戚斧也○釋名云戚感也斧以斬斷見者皆感懼也

揚

傳云揚鉞也疏云鉞大而斧小大公六韜云大柯斧重八斤一名天鉞○劉存事始末案輿服志曰黃帝制以銅為鳳首銜刃古今注云金斧黃鉞也鐵斧玄鉞也三代通用之武王以黃鉞斬紂太公以玄鉞斬妲己將軍出征授黃鉞者亦以銅為之○韓詩外傳云諸侯有德八

錫鉢鉞

巘

傳云巘小山別于大山也○釋名云小山別大山曰巘  
巘甑也甑一孔者巘形孤出處似之也○爾雅云重巘  
陳注云謂山形如累兩巘巘山形似之因以名云

百泉溥原

曹氏曰漢朝那縣屬安定郡隋改為百泉縣屬平涼郡  
魏于其地置原州唐因之百泉溥原即其處○一統志

陝西平涼府鎮原縣漢為安定郡後魏置原州

廬

周禮遺人凡國野之道十里有廬廬有飲食三十里有宿宿有路室路室有委五十里有市市有候館候館有積注廬若今野候徒有序也宿可止宿若今亭有室矣候館樓可以觀望者也一市之間有一廬三宿

依

箋云公劉既登堂負辰而立○爾雅云牖戶之間謂之

展注云窻東戶西也禮云斧扆者以其所在處名之疏云本戶牖之間名扆覲禮天子設屏風之狀于戶牖間因名此屏風為扆是以其在扆處即名曰扆也○覲禮云天子負斧依于戶牖之間左右几注云依如今綈素屏風也有繡斧文所以示威○明堂位云天子負斧依南鄉而立

牢

禮書曰養馬謂之閑養牛羊豕謂之牢閑以防之牢以

固之各象其性而制之也○郊特牲云帝牛必在滌三  
月稷牛惟具鄭氏曰滌者牢中搜除處○周禮肆師大  
祭祀展犧牲繫于牢頒于職人充人掌繫祭祀之牲祀  
五帝則繫于牢芻之三月享先王亦如之○何休公羊  
注云滌宮名養帝牲三牢之處也滌取其蕩滌潔清三  
牢者各主一月取三月一時足以充其大牲

匏

陸佃禮圖云舊圖匏爵用匏片為爵據此乃杓也若爵

宜截其鼻以盛酒不應破匏為之鄭氏說取甘匏去抵以齊為正○禮記云郊器用陶匏以象天地之性也又云三王作牢用陶匏

流泉

郡縣志云邠州三水縣以縣界有羅川谷三泉並流故以為號幽城在縣西高泉山亦曰甘泉在永壽縣北二十五里五龍原在新平縣南三里原側有五泉水因名

三單

互見無衣篇師

箋云公劉遷豳丁夫適滿三軍之數單者無羨卒也○  
春秋傳曰成國不過半天子之軍諸侯之大者三軍可  
也○周禮小司徒上地家七人可任者家三人中地家  
六人可任者二家五人下地家五人可任者家二人凡  
起徒役毋過家一人以其餘為羨惟田與追胥竭作賈  
氏曰此謂六鄉之內上劑致厖一人為正卒其餘為羨  
卒若六遂之內以下劑致厖一人為正卒一人為羨卒  
其餘皆為餘夫饒遠故也○遂人以下劑致厖注云以



下劑為率謂可任者家二人

隰原

孔氏曰禹貢雍州原隰底績公劉居豳度其隰原以治田是豳居原隰之野○郡縣志云邠州新平縣有五龍原永壽縣有永壽原宜祿縣有淺水原

徹

孟子曰夏后氏五十而貢殷人七十而助周人百畝而徹徹者徹也助者藉也詩云雨我公田遂及我私惟助

為有公田由此觀之雖周亦助也○王制曰古者公田  
藉而不稅○左傳云穀不過藉以豐財也○穀梁傳云  
古者什一藉而不稅○公羊傳曰古者什一而藉○鄭  
匠人注云周制畿內用夏之貢法稅夫無公田邦國用  
殷之助法制公田不稅夫貢者自治其所受田貢其稅  
穀助者借民之力以治公田又使收斂焉諸侯謂之徹  
者通其率以什一為正孟子云野九夫而稅一國中什  
一是邦國亦異外內之法耳○朱子孟子章句云周時

一夫受田百畝鄉遂用貢法十夫有溝都鄙用助法八家全井耕則通力而作收則計畝而分故謂之徹語錄云此亦不可詳知但因洛陽議論中通徹而耕之說推之耳或但耕則通力收則各得其畝亦未可知也

按徹兼貢助二法助法當如朱子所言公田有廬舍在內是也如鄭通率之說則助之所取重貢之所取輕非孟子皆什一之旨也

夕陽

爾雅曰山西曰夕陽孫炎曰夕乃見日

鍛

傳云鍛石也箋云所以為鍛質○說文作礲云厲石也  
朱傳云鍛鐵也○禹貢梁州厥貢璆鐵銀鏤○月令季  
春命工師審五庫之量金鐵毋或不良○廣雅云鐵朴  
謂之礪○一統志終南山出鐵

皇澗過澗

傳氏曰二澗當在邠州界

芮

傳云芮水厓也箋云芮之言內也○朱傳云芮水名出吳山西北東入涇周禮職方作汭○夏官職方云雍州其川涇汭注云汭在豳地○一統志汭水在陝西鳳翔府隴州城西北源出弦蒲藪東入涇水周職方雍州其川涇汭詩曰汭鞠之即皆謂是也吳嶽在隴州南八十里

鞠

爾雅曰隩隈也。厓內為隩，外為鞠。李巡曰：厓內近水為隩，其外為鞠。孫炎曰：內曲裏也，外曲表也。

洞酌篇

餠

傳云餠，餹也。○釋言云：饋，餹稔也。孫炎曰：蒸之曰饋，均之曰餹。郭璞曰：今呼餐飯為饋，饋熟為餹。○說文云：饋，一蒸米也。餹，飯氣流也。

卷阿篇

版

朱傳或曰版當為版版章猶版圖也○周禮小司徒聽閭里以版圖司會云掌凡在版圖者之貳以逆羣吏之治注版戶籍也圖土地形象田地廣狹司書掌邦中之版土地之圖職方氏掌天下之圖小司寇登民數自生齒以上登于天府司民掌登萬民之數自生齒以上皆書于版

鳳凰

釋鳥云鷗鳳其雌皇○說文天老云鳳象鴻前麟後蛇  
頸魚尾鸛頰鴛思龍文龜背燕頤鷄喙五色備舉出東  
方有道之國翔翔四海之外過崑崙飲砥柱濯羽弱水  
莫宿風穴飛則羣鳥從以萬數五方神鳥東方曰發明  
南方曰焦明西方曰鷦鷯北方曰幽昌中央曰鳳皇○  
左傳云鳳鳥氏司歷杜預云鳳知時故以名歷官○大  
戴禮羽蟲三百六十鳳皇為之長○禮運云鳳以為畜  
故鳥不獍○詩義疏云鳳皇一名鸞鸞非梧桐不棲非



竹實不食非醴泉不飲在天為朱雀○韓詩外傳天老  
曰鳳首帶德頸揭義背負仁心入信翼挾義足履正尾  
繫武小音金大音鼓食有質飲有儀游心擇所飢不妄  
下其鳴也雄曰節節雌曰足足昏鳴曰固常晨鳴曰發  
明晝鳴曰保章舉鳴曰上翔集鳴曰歸昌○元命包云  
火離為鳳○運斗樞云天樞得則鳳凰翔○斗威儀曰  
君乘土而王其政太平鳳皇集於林苑○樂叶圖徵云  
五音克諧各得其倫則鳳皇至冠類鷄頭燕喙蛇頸龍

形麟翼魚尾五彩不啄生蟲又曰五鳳為瑞者一其四  
似鳳並為妖一曰鸛鷀至則役之感二曰發明至則喪  
之感三曰焦明至則水之感四曰幽昌至則旱之感○  
動聲儀云鎮星不逆行則鳳皇至○論語摘裏聖曰鳳  
有六像九色六像者頭像天目像日背像月翼像風足  
像地尾像緯九色者口色命心合度耳聰達舌詘伸彩  
色光冠矩州

宋均云州當作朱

距銳鉤音激揚腹文戶行鳴曰

歸嬉止鳴曰提扶夜鳴曰善哉晨鳴曰賀世飛鳴曰郎

都知我者唯黃持竹實來故子欲居九夷從鳳嬉○山海經云丹穴之山有鳥如鷄五采而文名曰鳳皇首文曰德翼文曰義背文曰禮膺文曰仁腹文曰信飲食自然自歌自舞見則天下安寧○帝王世紀云國安其主好文則鳳皇翔○莊子云鳳帶聖嬰仁左智右賢○荀子曰詩曰鳳皇秋秋其翼若干其聲若簫有鳳有皇樂帝之心○呂氏春秋云黃帝聽鳳皇之鳴以別十二律○淮南子云二皇鳳至於庭三代鳳至於門周室鳳至

於澤德彌澆所至彌遠德彌精所至彌近○京房易傳  
云鳳皇高丈二○三輔決錄蔡衡云凡鳳有五多赤色  
者乃鳳多黃色者鵠鵠多青色者鸞多紫色者鸞鸞多  
白色者鵠○禽經云鳳青謂之鵠赤謂之鸞黃謂之鸞  
白謂之鸞紫謂之鸞○瑞應圖云鳳皇仁鳥王者不刳  
胎剖卵則至

梧

詳見定之方中篇桐

釋木云櫨梧注今梧桐○青史子云梧東方之草春木

也○王逸子云梧桐春榮陽木也○埤雅云梧一名櫟  
即梧桐也今人以其皮青號曰青桐華淨妍雅極可愛  
故多近齋閣種之梧橐鄂皆五馬其子似乳綴其橐鄂  
生多或五六少或一二飛鳥喜巢其中莊子所謂桐乳  
致巢也○雅翼云梧木易生鳥銜墜者輒隨生殖其畦  
種者是歲可高一丈

朝陽

釋山云山東曰朝陽孫炎曰朝先見日也

板篇

藥

說文治病草○周禮疾盪以五藥養其病注云草木蟲  
石穀也瘍盪凡藥以酸養骨以辛養筋以鹹養脈以苦  
養氣以甘養肉以滑養竅○本草經云上藥養命以應  
天中藥養性以應人下藥治病以應地藥有陰陽配合  
子母兄弟根莖華實草石骨肉○三皇紀云神農始嘗  
百草始有盪藥

六家詩名物疏卷四十九

欽定四庫全書

經部

六家詩名物疏卷

五十二

詳校官監察御史臣沈孫璉

通政使司副使臣莫瞻菴覆勘

總校官中書臣朱鈐

校對官中書臣吳俊

謄錄監生臣劉宗望



欽定四庫全書

六家詩名物疏卷五十一

明

馮復京

撰

大雅蕩之什一

蕩篇

羹

爾雅云肉謂之羹○廣雅云羹謂之湑○釋名云羹汪也汁汪郎也○天官亨人祭祀共大羹鉶羹賓客亦如之疏云大羹肉湑盛於登謂大古之羹不調以鹽菜及

五味鉶羹是陪鼎腳臚臠調以五味盛於鉶器謂之鉶羹若盛之於豆即謂之庶羞即公食大夫十六豆也○公食大夫記云鉶芼牛藿羊苦豕薇皆有滑士虞記云鉶芼用苦若薇有滑夏用葵冬用菹○曲禮云進食之禮羹居人之右毋嚙羹毋絮羹羹之有菜者用挾無菜者不用挾禮運云退而合亨實其鉶羹禮器云納牲詔於庭血毛詔於室羹定詔於堂郊特牲云大羹不和貴其質也內則云膳腳臠臠食雉羹麥食脯羹鷄羹折稌

犬羹兔羹和糝不蓼凡羹齊視夏時士不貳羹鵝羹  
鷄羹釀之蓼羹食自諸侯以下至于庶人無等玉藻云  
子邠稷食菜羹○毛詩義問云鉶羹有菜鹽豉其中菜  
為其形象可食因以鉶為名○朱子云鄉飲酒禮鄉射  
禮燕禮大射儀公食大夫禮少牢饋食禮皆曰羹定蓋  
以羹熟為節然後行禮

### 鬼方

易高宗伐鬼方○大戴禮帝繫曰陸終娶于鬼方氏○

世本注云鬼方於漢則先零戎○後漢西羌傳云武丁伐西戎鬼方三年乃克○唐高祖紀云夏曰熏鬻商曰鬼方周曰玁狁漢曰匈奴魏曰突厥○朱子殷武傳曰高宗伐鬼方蓋謂是與

按鬼方不詳其地蓋是遠夷之國也古有三說俱非確證

本

說文曰木下曰本从木一在其下徐曰一記其處也

抑篇

蠻方

鄭注云九州之外不服者疏云謂治夷鎮蕃三服○禹貢五百里荒服三百里蠻二百里流○大司馬云蠻畿外方五百里曰夷畿又其外方五百里曰鎮畿又其外方五百里曰蕃畿大行人云九州之外謂之蕃國世一見各以其所貴寶為摯○周語云蠻夷要服戎狄荒服

屋漏

爾雅云西北隅謂之屋漏孫炎曰當室之所白日光所漏入舍人曰古者徹屋西北隅以炊浴沒者訖而復之故謂之屋漏○箋云屋小帳也漏隱也禮祭于奧既畢改設饌于西北隅而扉隱之處此祭之末也疏云天官幕人職掌帷幕幄帟注云幕以布幄帟以繒為之幄在帷幕內則為小帷室內亦有之屋漏者正謂西北隅也言祭末時事者特牲禮尸設之後云佐食徹尸薦俎敦設于西北隅凡在南扉用筵納一尊佐食闔牖戶降是

其事也禮記鄭注云祭成人始設奠于奧是謂陰厭尸  
謖後改饌于西北隅是謂陽厭若宗子為殤惟有陰厭  
若庶子適殤宗子適殤惟有陽厭士有陰厭陽厭天子  
諸侯亦同唯上大夫無陽厭為當日賓尸故也

按鄭之義以陽厭為祭末之事助祭者至此易倦故  
以不愧戒之考之特牲禮陰厭尊有玄酒陽厭納一  
尊而已陰厭備鼎俎陽厭俎釋三个而已則非徒在  
祭末而其禮亦略矣朱子云獨居於室不主祭言故

通旃瓊言云不愧屋漏猶曰不愧闇室然孔子云當  
室之白尊于東房是謂陽厭則屋漏非暗室矣此箋  
云扉隱之處蓋用儀禮扉用筵之文彼文又云佐食  
闔牖戶降則室內無人故彼注云改饌為幽闇有司  
徹司宮闔牖戶注云或者神欲幽闇是也非以屋漏  
為闇室也若詩取暗室之義則宜云不愧于奧不得  
云不愧于屋漏若欲從朱說者但謂室中雖虛尚當  
不愧于西北之隅理亦自通何必指明為暗反孔子



之說乎

柔木

箋云柔忍之木被之弦以為弓○考工記弓人為弓取  
幹之道七柘為上櫪次之檠桑次之橘次之木瓜次之  
荆次之柝為下凡相幹欲赤黑而陽聲赤黑則鄉心陽  
聲則遠根

桑柔篇

圉

釋詁云圉垂舍人曰圉拒邊垂也孫炎曰國之四垂

相

漢書云丞相掌承天子助理萬機○蔡邕獨斷云相助也助理天下

肺

說文云肺金藏也○釋名云肺勃也其氣鬱勃也○素問云西方生燥燥生金金生辛辛生肺肺生皮毛皮毛生腎肺主鼻又云肺者相傳之官治節出焉又云肺者

氣之本魄之處也其華在毛其充在皮為陽中之大陰  
通於秋氣○文子云肺為氣○白虎通云肺所以義何  
肺者金之精義者斷決西方亦殺成萬物故肺象金色  
白繫於鼻

### 腸

說文云腸大小腸也○釋名云腸暢也暢胃氣去滓穢  
也○廣雅云腸詳也○素問云六經為川腸胃為海又  
云脾胃大腸小腸者倉廩之本營之居也名曰器能化

糟粕轉味而入出至陰之類通於土氣○白虎通云大腸小腸心之府也主禮禮有分理腸亦大小相承受也

大風

箋云西風謂之大風○釋天云西風謂之泰風孫炎曰西風成物物豐泰也○易緯云立秋閭闔風至○呂氏春秋曰西方曰颶風

隧

孔氏曰隧者道之別名

雲漢篇

郊

周禮太宰祀五帝掌百官之誓戒與其具修前期十日  
帥執事卜日遂戒及執事視滌濯及納亨贊王牲事祀  
之日贊玉幣爵之事冢人祭祀以疏布巾冢八尊掌次  
祀五帝張大次小次設重帟重案大司徒祀五帝奉牛  
牲羞其肆充人掌繫祭祀之牲牲祀五帝則繫于牢芻  
之三月大宗伯以青圭禮東方以赤璋禮南方以白琥

禮西方以玄璜禮北方皆有牲幣各放其器之色祀大神祭大亦治其大禮國有大故則旅上帝小宗伯兆五帝于四郊大哉及執事禱祠于上下神亦典瑞四圭有邸以祀天旅上帝兩圭有邸以事地旅四望司服祀昊天上帝則服大裘而冕祀五帝亦如之大司樂奏黃鍾歌大呂舞雲門以祀天神奏大簇歌應鍾舞咸池以祭地亦大祝掌六祈一曰類大司冠禋祀五帝涖誓百官祭之日奉明水火小司冠禋祀五帝實饗水納亨亦如

之職金旅上帝共其金版士師祀五帝則沃尸及王盥  
洎鑊水○禮記月令孟春元日祈穀于上帝仲夏大雩  
帝禮運云祭帝于郊所以定天位祀社于國所以列地  
利禮器有以下為貴者至敬不壇埽地而祭有以素為  
貴者大圭不琢大羹不和大路素而越席犧尊疏布鼐  
簠又云禮之近人情者非其至者也郊血又云莞簟  
之安而橐桔之設又云饗帝于郊而風雨節寒暑時郊  
特牲云郊特牲而社稷太牢郊之祭迎長日之至也大

報天而主日也兆于南郊就陽位也埽地而祭于其質也器用陶匏以象天地之性也牲用騂尚赤也用犢貴誠也郊之用辛也周之始郊日以至卜郊受命于祖廟作龜于禰宮卜之日王立于澤親聽誓命獻命庫門之內戒百官也太廟之命戒百姓也祭之日王皮弁以聽祭報被袞以象天戴冕璪十有二旒乘素車旂有十二旒龍章而設日月帝牛必在滌三月稷牛惟具所以別事天神與人鬼也祭法云燔柴於泰壇祭天也瘞埋于



泰折祭地也用騂犢祭義云郊之祭也喪者不敢哭凶服者不敢入國門敬之至也大報天而主日配以月夏后氏祭其闇殷人祭其陽周人祭日以朝及闇明堂位云魯君孟春乘大路載弧韜旂有十二旒日月之章祀帝于郊配以稷天子之禮也○公羊傳云郊則曷為必祭稷王者必以其祖配自內出者無主不行自外至者無主不止

奠瘞

孔氏曰奠謂置之於地瘞謂埋之於地禮與物皆謂為  
禮事神之物酒食牲玉之類也○爾雅云祭天曰燔柴  
祭地曰瘞瘞疏云祭天之禮積柴以實牲體玉帛而燔  
之使烟氣之臭上達於天祭神州地示於北郊瘞繒埋  
牲因名祭地曰瘞埋

宗

傳云宗尊也凶荒索鬼神而祭之○周禮大司徒荒政  
十一曰索鬼神黨正春秋祭禘大祝掌六祈類造禴禘

攻說小祝掌侯禳禱祠之祝號以逆時雨寧風旱○祭  
法云埋少牢於泰昭祭時也相近於坎壇祭寒暑也王  
宮祭日也夜明祭月也幽宗祭星也雩宗祭水旱也四  
坎壇祭四方也山林川谷丘陵能出雲為風雨見怪物  
皆曰神有天下者祭百神注相近當為禳祈宗皆當為  
禳疏此經所載謂四時乖序寒暑僭逆水旱失時須有  
祈禱非闕正禮之事○左傳子產云山川之神則水旱  
厲疫之災於是乎禱之日月星辰之神則雪霜風雨之

不時於是乎禋之

羣公先正

月令仲夏命有司為民祈祀山川百源大雩帝用盛樂  
乃命百縣雩祀百辟卿士有益于民者以祈穀實注百  
辟卿士古者上公若句龍后稷之類疏百辟則古之上  
公國語鯀為宗伯祭法有祀之文社稷五祀雖為王朝  
卿士兼帶上公之官故左傳云封為上公祀為貴神○  
周禮舞師掌教皇舞帥而舞旱暵之事稻人旱暵共其

雩斂司巫若國大旱則帥巫而舞雩女巫巫旱暵則舞雩  
左傳云龍見而雩

旱魃

說文魃旱鬼也○神異經云南方有人長二三尺袒身  
目在頂上走行如風名曰魃所見之國大旱赤地千里  
一名旱母遇者得之投溷中即死旱災消也○山海經  
係昆之山有人衣青衣名曰黃帝女魃黃帝攻蚩尤冀  
州之野蚩尤請風伯雨師縱大風雨黃帝乃下天女曰

魃雨止遂殺蚩尤魃不得復上所居不雨叔均言之帝  
後置之赤水之北所欲逐之者令曰神北行○文字指  
歸云女魃禿無髮

祈年

疏云孟春祈穀孟冬祈來年是也○月令孟春天子  
乃以元日祈穀于上帝注云謂以上辛郊祭太  
微之帝疏云郊特牲云郊不言祈穀此經言祈穀  
不言郊鄭以為二祭是一故此注謂以上辛郊祭也

郊各祭所感之帝殷人祭汁先紀周人祭靈威仰○左  
傳孟獻子云郊祀后稷以祈農事也是故啟蟄而郊郊  
而後耕注云啟蟄夏正建寅之月耕謂春分○又云孟  
冬天子祈來年于天宗注云天宗謂日月星辰也  
○蔡邕云日為陽宗月為陰宗北辰為星宗○大  
宗伯以實柴祀日月星辰注云星謂五緯辰謂日月所  
會十二次疏云五緯即五星東方歲星南方熒惑西方  
太白北方辰星中央鎮星辰雖據日月會時而言即二

十八星也○祭義云郊大報天而主日配以月疏云天  
帝獨為壇其日月及天神等各為一壇○爾雅云祭星  
曰布

按此祈來年於天宗既非遇災禱禳則與祭法所云  
王宮夜明幽榮祭日月星者異矣又非朝日夕月則  
與祭義所云祭日于壇祭月于次者異矣其禮當如  
郊祭主日配月者日月及五緯星二十八經星合為  
一壇而以實柴祀之牲蓋用牛以大宗伯注推之可



見

庶正

疏云正長也周官三百六十每官各有其長

崧高篇

崧

釋山云山大而高崧注今中嶽嵩高山蓋依此名○釋名云崧竦也亦高稱也

嶽

釋山云泰山為東嶽華山為西嶽霍山為南嶽恒山為北嶽嵩丘為中嶽○禮記云巡狩至于岱宗柴而望祀山川南嶽西嶽北嶽如初禮天子祭天下名山五嶽視三公○大宗伯以血祭祭五嶽國有大故旅四望注云四望五嶽四鎮四瀆典瑞兩圭有邸以旅四望司服祀四望山川則毳冕大司樂奏姑洗歌南呂舞大磬以祀四望凡五嶽崩令去樂職方氏荊州衡山豫州華山兗州岱山并州恒山○白虎通云嶽之為言桶桶功德東

岱宗者言物更相代於東方南霍者護也太陽用事護  
養萬物西華者穫也萬物成熟可得穫也北恒者常也  
萬物伏藏有常也中央嵩山言其峻大之也○風俗通  
云東方泰山尊曰岱宗岱始也宗長也萬物之始陰陽  
交代故為五嶽長南方衡山一名霍霍者萬物盛長垂  
枝布葉霍然而大西方華者萬物變華於西方也北方  
恒者常也中央嵩者高也○說苑云五嶽能大布雲雨  
焉能大歛雲雨焉雲觸石而出膚寸而合不崇朝而雨

天下德施博，大故視三公也。○山海經云：泰山上多玉，下多金，有獸曰狌狌，太華之山削成而四方，高五千仞，廣十里，鳥獸莫居，有蛇名肥蠃，小華之山木多荆杞，獸多狝牛，陰多磬石，陽多璊璵之玉，鳥多赤鷩，艸有萆荔，衡山上多青藿，多桑其，鳥多鸛鵒，北嶽之山多枳棘，剛木有獸，名諸懷，少室之山有木名帝休，上多玉，下多鏤，泰室之山有栟木，蒿艸多美石。

按泰山在今山東濟南府泰安州北五里，華山在陝

西西安府華州華陰縣南十里衡山在湖廣衡州府  
衡山縣西三十里恒山在直隸真定府定州曲陽縣  
西北一百四十里嵩山在河南河南府登封縣北十  
里禹貢之外方也東謂太室西謂少室相去十七里  
嵩其摠名也衡山一名霍故孔安國注尚書鄭玄注  
大宗伯服虔注左傳及孝經鉤命決龍魚河圖皆以  
衡山為南嶽而書傳白虎通風俗通爾雅廣雅說苑  
諸書並以霍山為南嶽衡霍一也即今衡州之衡山

也直隸廬州府六安州有霍山即天柱山漢武南  
巡以衡嶽遠阻乃移嶽神於此而祀焉其後因得衡  
山之名郭璞以六安之霍為南嶽非也鄭注大司樂  
五嶽數雍州之吳嶽而不數嵩蓋以職方九州有吳  
嶽無嵩高取爾雅五山五嶽差而配之以充五嶽四  
鎮故云爾其實五嶽不數河西嶽也吳嶽山在今陝  
西鳳翔府隴州南八十里

伯

周書云士率衆時作謂之伯○要畧云伯把也持政事也○風俗通云伯者長也白也言其咸建五長功實明白也○王制云伯七十里○周禮云諸侯之地封疆三百里其食者參之一又云伯執躬圭其他皆如諸侯之禮

私人

有司徹云主人降獻私人注云大夫言私人明不純臣○玉藻云大夫私事使私人擯

介圭

釋器云珪大尺二寸謂之玠○大宗伯以玉作六瑞以等邦國玉人之事鎮圭尺有二寸天子守之命圭九寸謂之桓圭公守之命圭七寸謂之信圭侯守之命圭七寸謂之躬圭伯守之

按介之為言大也毛以為諸侯之瑞圭是也鄭獨以為尺二寸之圭不知尺二寸乃王之鎮圭豈得以賜諸侯乎尚書太保承介圭孔安國云大圭尺二寸天



子守之可證介圭即鎮圭也

郿

朱傳云郿在鎬京之西岐周之東○一統志郿縣在陝西鳳翔府城東南百四十里郿城在郿縣北十五里渭水之北

六家詩名物疏卷五十

欽定四庫全書

六家詩名物疏卷五十一 明 馮復京 撰

大雅蕩之什二

烝民篇

考

釋親云父為考母為妣○白虎通曰考成也言有成德  
○曲禮曰生曰父母妻死曰考妣嬪

喉

說文云喉嚨也○素問曰喉主天氣咽主地氣○物理  
論云咽喉生之要孔

韓奕篇

梁山

禹貢冀州既載壺口治梁及岐○釋山云梁山晉望也  
注云在夏陽西北臨河上○地里志在馮翊夏陽縣故  
少梁梁山在西北○九域志山在龍門之南○括地志  
在同州韓城縣東南一十九里○玉海云梁山在京兆

府奉天縣北五里古公踰梁山秦立梁山宮又同州韓城縣南十九里亦有梁山漢左馮翊夏陽縣西北詩所謂奕奕梁山也爾雅以為晉望

按同州韓城縣今屬陝西西安府古之韓國晉為少梁秦漢之夏陽縣也梁山在其境非大王遷岐所踰之梁山也大王所踰之梁山在乾州西北五里乾州即唐之奉天縣也

韓

左傳云韓武之穆也○通典同州韓城縣古韓國有韓原○一統志古韓城在韓城縣南十八里

按水經注引王肅曰涿郡方城縣有韓侯城後魏志亦云范陽郡方城縣有韓侯城此詩下文又有燕師所完奄受壯國之文故李氏疑韓國在燕地古方城縣即今順天府固安縣地也存之以備參考

受命

朱傳云蓋即位除喪以士服入見天子而聽命○王制

云諸侯之世子未賜爵視天子之元士以君其國○韓  
詩內傳云諸侯世子三年喪畢上受爵命于天子○白  
虎通云世子上受爵命衣士服何謙不敢自尊也故詩  
曰韎韐有奭世子始行也

覲 互見沔水篇朝

大宗伯云秋見曰覲大行人云秋覲以比邦國之功○  
覲禮云侯氏裨冕釋幣于禰乘墨車載龍旂弧韜乃朝  
以瑞玉有繅天子設斧依于戶牖之間左右几天子衮

冕負斧依侯氏入門右坐奠圭再拜稽首擯者謁侯氏  
坐取圭升致命王受之王侯氏降階東北面再拜稽首擯  
者延之曰升升成拜乃出記凡侯于東箱偏駕不入王  
門奠圭于纁上

入覲

互見商頌長發篇

箋云覲於宣王而奉享禮○周禮內府凡四方之幣獻  
之金玉齒革兵器凡良貨賄入焉大行人云廟中將幣  
三享注皆束帛加璧庭實惟國所有小行人云合六幣



圭以馬璋以皮璧以帛琮以錦琥以繡璜以黼玉人云  
璧琮九寸諸侯以享天子瑑琮八寸諸侯以享夫人○  
覲禮云四享皆束帛加璧庭實惟國所有注云四當為  
三初享或用馬或用虎豹之皮其次享三牲魚腊籩豆  
之實龜也金也丹漆絲纊竹箭也其餘無常貨惟所有  
分為三享皆以璧帛致之又云奉束帛匹馬卓上九馬  
隨之奠幣再拜稽首升致命王撫玉侯氏降自西階東  
面授宰幣西階前再拜稽首以馬出授人九馬隨之事

畢

綏章

傳云綏大綏也○王制云天子殺則下大綏諸侯殺則下小綏注綏當為綏有虞氏之旌旗也明堂位云夏后氏之綏注云虞當言綏夏當言旂蓋錯誤也綏謂注旄牛尾于杠首所謂大麾周禮建大麾以田○夏采注云徐州貢夏翟之羽虞以為綏後世或無染鳥羽象而用之或以旄牛尾為之綴於幢上所謂注旄於竿首

互見干旄

旌旄

○箋云綏所引以登車有采章也○說文曰綏車中把也○曲禮曰君車已駕僕取貳綏跪乘凡僕人之禮必授人綏乘路馬必朝服不敢授綏少儀曰執君之乘車則坐僕者右帶劔負良綏申之面拖諸辟以散綏升執轡然後步○論語曰升車必正立執綏

### 鏤錫

疏云金路無錫有鈎此金路得有鏤錫者蓋特賜之○

巾車云玉路錫樊纓注錫馬面當盧刻金為之所謂鏤錫當盧者當馬之額盧在眉眼之上

鞞

傳云鞞軾中也○考工記輿人為車參分車隧一在前二在後以採其式以其廣之半為之式崇參分軻圍去一以為式圍○孔氏云軾者兩較之間有橫木可憑者也

淺

傳云虎皮淺毛也○月令其蟲倮注云虎豹之屬恒淺毛

幟

傳云帀覆式也○玉藻云君羔帀虎犴大夫齊車鹿帀豹犴朝車士齊車鹿帀豹犴注云帀覆苓也少儀曰御負良綏申之面拖諸帀曲禮曰大夫士去國素箴○周禮王之喪車木車犬幟疏飾素車犬幟素飾藻車鹿淺幟革飾駟車然幟髮飾漆車豸幟雀飾○荀子曰絲末

彌龍所以養威也○禮書云幣若席然施諸軾上

諸書  
幣篋

襦未俱  
即機字

金厄

疏云毛以厄為厄蟲則金厄者以金接轡之端如厄蟲然鄭易傳以金為小環往往纏搯之往往者言非一二處

屠

李氏曰同州鄜谷○說文云鄜在馮翊郃陽亭○朱傳

或曰即杜也○解頤字義云屠蓋在鎬京東北之地未詳其處或以為在同州郿谷則太遠或以為即鄠縣之杜陵則其地在鎬京南不當至此也

### 壺

說文云壺昆吾園器也象形從太象其蓋也○周禮秋嘗冬蒸其饋獻用兩壺尊掌客上公壺四十夫人致禮八壺侯伯三十二夫人致禮八壺子男二十四夫人致禮六壺○禮記五獻之尊門內壺又云尊壺者面其鼻

特牲禮視壺濯尊兩壺于阼階東又曰覆兩壺焉蓋在  
南鄉飲酒尊兩壺于房戶間鄉射兩壺斯禁聘禮陳饗  
或八壺或六壺燕禮卿大夫兩方壺士旅兩圓壺公尊  
瓦大大射膳尊兩甒卿大夫方壺士旅圓壺少牢尊兩  
甒士喪大斂兩瓦甒虞兩甒○三禮圖云洗壺受一斛  
口徑一尺頭高五寸大中身兌下赤漆中上加青雲氣  
方壺受一斛腹圓足口方圓壺受一斛腹方足口圓

菽



釋器云菜謂之藟○孔氏云藟者菜茹之總名

筍

爾雅云筍竹萌筍箭萌○天官醢人云落菹雁醢筍菹  
魚醢○陸璣云筍皆四月生惟巴竹筍八月九月生始  
出地長數寸鬻以苦酒豉汁浸之可以就酒及食○呂  
覽云和之美者越駱之菌注越駱山名菌竹筍也○筍  
譜云竹初種根食土而下求乎母也及擢筍冒土而上  
愛乎子也筍大約不過青綠色本艸木性甲乙氣○李

英公本州云竹筍性甘無毒主消渴利水道益氣可久食

贈

觀禮云天子賜侯氏以車服路先設西上路下四亞之重賜無數在車南諸公奉篋服加命書于其上升自西階東面大史是右侯氏升西面立大史述命侯氏降兩階之間北面再拜稽首升成拜大史加書于服上侯氏受○樂記云大路者天子之車也龍旂九旒天子之旌

也青黑緣者天子之寶龜也從之以牛羊之羣則所以贈諸侯也

侯氏

覲禮注云不言諸侯言侯氏者明國殊舍異禮不凡之也

貓

傳云貓似虎淺毛者也○釋獸云虎竊毛謂之號貓注竊淺也詩曰有貓有虎又云狻麈如號貓○雅翼云虎

淺色謂之號貓而西域傳注稱獅子似虎正黃而有頰尾端毛大如斗又詩稱韓土之樂有貓有虎周書記武王之狩禽虎二十有二貓二則是虎之類也

按釋獸之文貓即虎之淺毛者以上下文熊羆虎類之知是猛獸非捕鼠之貓也捕鼠之貓形亦似虎又畫地卜食亦如虎其鼻端嘗冷惟夏至一日煖蓋陰類也故應陰氣如此與虎陽獸感風不全酉陽雜俎云貓一名蒙貴一名烏圓陸農師以貓食田鼠虎食

田畧故詩以譽韓樂失之矣

燕

朱傳云燕召公之國○地里志薊縣故燕國召公所封  
○國都城記云地在燕山之野故國取名焉北燕伯欵  
始見春秋○元命包云箕星散為幽州分為燕國○一  
統志順天府武王封堯後於薊封召公奭于燕即此燕  
山在薊州玉田縣西北二十里

百蠻

補傳云蠻夷可通稱北稱蠻猶西稱夷○史記匈奴傳  
居于北蠻

追貉

傳云追貉戎狄國箋云後追貉為獬狔所逼稍稍東遷  
疏云貉者東夷之種分居於北故於此時為韓所統○  
周官職方辨九貉之人民注云北方曰貉狄貉隸注云  
征東北夷所獲○說文云貉北方豸種孔子曰貉之為  
言惡也○漢書高紀云北貉燕人助漢師古曰貉在東

北方三韓之屬皆貉類也○地理考云後漢傳有貉耳  
小水貉濺貉之屬東夷之貉也

北國

箋云北面之國疏云職方氏正北曰并州言受王畿北  
面之國當是并州牧○黃氏曰今洛州曲梁赤狄也中  
山安喜鮮虞國真定鼓國豪城西壘肥國皆白狄也

壑

說文云壑溝也○釋言云隍壑也舍人曰隍城池也壑

溝也

貌

釋獸云貌白狐其子穀○陸璣云貌似虎或曰似熊一名執夷一名白狐遼東人謂之白羆○說文云虎豹屬出貉國○書云如虎如貌于商郊○曲禮曰前有摯獸則載貌貅○莊子曰豐狐文羆搏於山林伏於巖穴夜行晝居求食江湖之上

江漢篇



# 淮夷

陳傳良云江漢常武二篇同言淮夷以地里考之曰江漢之許者淮南之夷也若在淮北則江漢非所入之路也曰率彼淮浦省此徐土者淮北之夷也若在淮南則徐土非聯接之地矣孔氏曰召公伐淮夷在淮水南魯僖伐淮夷在淮水北當淮之南北皆有夷也○禹貢云淮夷蠙珠暨魚費誓云徂茲淮夷徐戎並興○春秋僖十四年杞辟淮夷遷都諸侯城緣陵十六年鄆為淮夷

所病會于淮謀郇○後漢東夷傳殷武乙衰敝東夷浸盛遂分遷淮岱漸居中土周公征之遂定東夷厲王無道淮夷入寇王命虢仲征之不克宣王復命召公伐而平之

卣

疏云鬱人掌和鬱鬯以實彝則鬯當在彝而此及尚書左傳皆云秬鬯一卣者當祭時乃在彝未祭則在卣賜時未祭故卣盛之○爾雅云彝卣罍器也卣中尊也孫

炎曰尊彛為上壘為下自居中郭璞曰自不大不小者  
○周禮鬯人廟用脩注云廟用脩者謂始禘時自饋熟  
始脩讀曰自自中尊謂獻象之屬

常武篇

太祖

傳云命南仲於太祖疏云后稷太祖之廟

程

楚語云重黎氏世叙天地在周程伯休父其後也當宣

王失其官守而為司馬氏韋昭云程國伯爵休父名也  
失官謂失天地之官而以諸侯為大司馬○郡國志雒  
陽有上程聚古程伯休父之國也○一統志上程聚在  
河南府洛陽縣

浦

說文云浦水濱也

徐

曹氏云禹貢徐州東至海北至岱南及淮其地廣人衆

矣若淮夷則東夷之種散處淮浦者爾○陳氏曰徐大  
而淮夷小淮夷即徐州之夷而服屬於徐曰徐方者兼  
徐淮而言之曰徐國者特言徐戎也○地里志臨淮徐  
縣故徐國○郡縣志大徐城在泗州徐城縣北三十里  
徐子國○玉海云徐嬴姓伯益佐禹有功封其子若木  
於徐○一統志直隸鳳陽府泗州春秋時徐子國徐城  
在州北五十里

三事

箋云三農之事○太牢云以三農生九穀先鄭云三農平地山澤也玄謂原隰及平地○朱子云上中下農夫

釋

箋云釋當作驛傳遽之驛○周禮行夫掌邦國傳遽之小事注云傳遽若今時乘傳騎驛而使者也○廣雅云郵驛也置亦驛也○漢書田儵傳云尸鄉廐置臣瓚曰案廐置謂置馬以傳驛者○李陵傳云因騎置以聞師古曰騎置謂驛騎也○丹鉛總錄云按說文驛置騎也

駟驛傳也合觀之驛主于騎言馬也駟主于傳言車也  
字書馬遽曰置步遽曰郵漢謂之乘傳如淳曰漢律四  
馬高足為置傳四馬中足為駟傳四馬下足為乘傳一  
馬二馬為輶傳又謂之遽

瞻卬篇

織

說文曰織作布帛之總名○內則云女子十年不出執  
麻枲治絲繭織紵組紃學女事

狄

爾雅八狄注云八狄在北○周官職方氏辨六狄之人  
民○王制云北方曰狄衣羽毛穴居有不粒食者矣明  
堂位五狄之國○風俗通云父子嫂叔同穴無別狄者  
辟也其行邪辟其類有五一曰月支二曰穢貊三曰匈奴  
四曰單于五曰白屋

召旻篇

昏



箋云昏祿皆闔人也昏其官名○周禮闔人王宮每門  
四人掌守王宮中門之禁喪服凶器不入宮潛服賊器  
不入宮奇服怪民不入宮凡內人公器賓客無帥則幾  
其出入以時啟閉掌掃門庭○天官酒人奄十人注云  
奄精氣閉藏者漿人奄五人籩人醢人各奄一人醢人  
鹽人各奄二人冪人奄一人內小臣奄上士四人寺人  
王之正內五人內監倍寺人之數地官舂人饎人各奄  
二人豪人奄八人春官守桃奄八人

苴

傳云水中浮艸○箋云樹上棲苴○疏云苴是艸木之枯槁者故在樹未落及已落為水漂皆稱苴也

按毛以苴為水中浮艸鄭以棲者居在木上之名謂水上為棲于理未愜故易之云樹上棲苴朱傳云水中浮草棲于木上者意欲合二說為一不知既漂水中何緣仍居木上若如蒲柳等木本生水邊故水中草得棲之則為水浸潤不得枯槁進退求之朱義難

通

疏糶

朱傳云疏糶也糶則精矣○九章算術云粟率五十糶  
米三十糶二十七鑿二十四御二十一

六家詩名物疏卷五十一